



Bošnjačko nacionalno vijeće u Republici Srbiji
Bosniac National Council in the Republic of Serbia
Национални савјет бошњачке националне мањине

REPUBLIKA SRBIJA
VLADA REPUBLIKE SRBIJE
G-đa Ana Brnabić, predsjednica
Nemanjina 11, 11000 Beograd

U Novom Pazaru, 9. septembra 2022. godine
Broj: 616-01/2022

Uvažena predsjednice Vlade Srbije,

Cijeneći Vaše težnje i vidljive napore Vlade Republike Srbije da doprinese u rješavanju krize na prostoru bivše SFRJ, obraćam Vam se u ime najvišeg političkog i predstavničkog tijela Bošnjaka Sandžaka, Bošnjačkog nacionalnog vijeća u Republici Srbiji sa zahtjevom da se u Bosni i Hercegovini poništi politička dobit ostvarena udruženim zločinačkim poduhvatom i genocidom tokom agresije srpskih oružanih snaga na Bosnu i Hercegovinu.

Bošnjačko nacionalno vijeće traži od Vas i Vlade Republike Srbije da podrži ovaj naš zahtjev i time svima pošalje jasnu poruku da će politička dobit ostvarena udruženim zločinačkim poduhvatom i genocidom biti poništena.

Bošnjake Sandžaka zabrinjava učestalo održavanje nenajavljenih vojnih vježbi i kretanje srpskih oružanih snaga kroz Sandžak koje Bošnjaci sa pravom doživljavaju kao realnu opasnost po biološki opstanak. Posebno zabrinjava višednevno gomilanje srpske vojske, vojne ratne tehnike, tenkova i raketnih bacača, ovih dana na planini Rogozna iznad Novog Pazara.

Usvajanjem ovog zahtjeva Vlada Republike Srbije će spriječiti srpske oružane snage da u Sandžaku ostvare svoju javno izrečenu prijetnju da će Novi Pazar doživjeti sudbinu Vukovara, a Sjenica sudbinu Srebrenice.

Dosadašnji tolerantan odnos od strane međunarodne zajednice prema zločinima u Bosni i Hercegovini motiviše srpsko nacionalno rukovodstvo da nastave praksu etničkog čišćenja i ostvare genocidne prijetnje nad Bošnjacima Sandžaka. Sve to čini da se Bošnjaci Sandžaka osjećaju nesigurnim u Republici Srbiji.

Bošnjačko nacionalno vijeće, kao aktivni učesnik Mirovne i Međunarodne konferencije o bivšoj SFRJ poziva na poštivanje usvojenog stava da se na prostoru bivše Jugoslavije neće priznavati teritorijalna osvajanja silom i etničkim čišćenjem kao svršen čin.

U ime Bošnjačkog nacionalnog vijeća u Republici Srbiji i u svoje ime izražavam zahvalnost na naporima koje činite na uspostavljanju pravednog i trajnog mira na Balkanu i želim Vam mnogo uspjeha u predstojećem radu.

Primite izraze našeg najvišeg poštovanja.


Predsjednica

Dr. Jasmina Curić